



Izveštaj sa 12. sjednice Općinskog vijeća Ilijaš

Dana, 31.10.2013. godine održana je 12. sjednica Općinskog vijeća Ilijaš.

Sjednici je prisustvovalo 25 vijećnika. Na dnevnom redu našlo se 18 tačaka, od kojih su dvije na prijedlog Načelnika vanredne i to: Snadbijevanje električnom energijom na području Općine Ilijaš i Odluka o izmjeni odluke o visini naknade vijećnicima i članovima stalnih i povremenih tijela Općinskog vijeća. Dnevni red kao i Zapisnik sa prethodne sjednice su jednoglasno usvojeni.

Načelnik se obratio vijećnicima i prisutnim povodom vanredne tačke o snadbijevanju električnom energijom na području Općine Ilijaš, i istakao da je, obzirom na učestale nestanke električne energije na području Općine Ilijaš, stanje zabrinjavajuće, a situacija je kulminirala prethodnog vikenda i u ponedjeljak, kada građani nisu imali napajanje električnom energijom 8 sati. Tako učestali nestanci električne energije ugrožavaju rad privrede, ustanova, narušava kvalitet rada i života građana. Načelnik je postavio pitanje obezbjeđenja objekata Elektrodistribucije i pitanje alternativnog napajanja električnom energijom u slučaju ponovnih krađa.

U nastavku sjednice obratio se prisutnim Načelnik V Policijske uprave i istakao da je ključni problem nestanka električne energije otuđenje kablova, što je složen i kompleksan društveni problem. Policijski službenici poduzimaju niz operativnih radnji da bi otkrili počiniocima ovih krivičnih djela. Policijska uprava sačinila je i Plan sprječavanja ovih krivičnih djela.

Načelnik Policijske uprave je istakao i to da je ovaj vid krađe međukantonalni i međuentitetski, u smislu da se otuđeni kablovi prodaju u drugim kantonima i drugom entitetu, te samim time teže je ući u trag počiniocima ovih krivičnih djela.

Predstavnici Elektrodistribucije su istakli da ove krađe kablova za napajanje električnom energijom nanose ogromne štete Elektrodistribuciji. Prema njihovim informacijama samo posljednja krađa je ovo preduzeće koštala 437,000 KM.

Što se tiče alternativnog napajanja, napajanje je moguće sa trafo stanice Breza i Semizovca ali to zahtjeva dodatne radove i nove redukcije električne energije.

Nakon duže rasprave Općinsko vijeće Ilijaš je jednoglasno usvojilo Zaključak da se traži hitno od Elektrodistribucije Plan rješenja situacije sa konkretnim rokovima i mjerama i isti dostavi Općinskom vijeću Ilijaš.

Odluku o pristupanju izradi Regulacionog plana "Podlugovi I" i "Podlugovi II" donijelo je Općinsko vijeće Ilijaš, na sjednici održanoj dana 26.08.2010. godine.

Javna tribina na temu Osnovne koncepcije Plana Regulacionog plana "Podlugovi I" i "Podlugovi II" održana je 19.07.2012. godine, u prostorijama Osnovne škole „Podlugovi“.

Dana, 02.09.2013. godine, u prostorijama Općine Ilijaš, održana je Javna rasprava o Nacrtu Regulacionog plana "Podlugovi I" i "Podlugovi II", na kojoj su građani iznijeli svoje primjedbe, prijedloge i sugestije.

Sve primjedbe, prijedlozi i sugestije iznesene u toku javne rasprave, razmotrene su na sastanku održanom 03.10.2013. godine u prostorijama Zavoda za planiranje razvoja Kantona Sarajevo, uz prisustvo predstavnika Zavoda i Općine Ilijaš.

Na današnjoj sjednici vijećnici su većinom glasova usvojili Odluku o usvajanju Regulacionog plana "Podlugovi I" i Odluku o provođenju Regulacionog plana "Podlugovi I".

U sklopu Plana definisane su zone sa sljedećim namjenama:

- ~ Zona individualnog stanovanja,
- ~ Stambeno-poslovna zona,
- ~ Zona centralnih djelatnosti,

- ~ Zona željezničke stanice Podlugovi,
- ~ Zona zaštitnog zelenila,
- ~ Zona regulisanog korita potoka Gnionica,
- ~ Zona saobraćajne infrastrukture.

Vijećnici su potrebnom većinom glasova usvojili Odluku o usvajanju Regulacionog plana "Podlugovi II" i Odluku o provođenju Regulacionog plana "Podlugovi II".

U sklopu obuhvata ovog Plana definisane su zone sa sljedećim namjenama:

- Zona individualnog stanovanja,
- Stambeno-poslovna zona,
- Zona centralnih djelatnosti,
- Privredna zona,
- Zona sporta, rekreacije i zelenila,
- Zona regulisanog korita rijeka Stavnje i Bosne i
- Zona saobraćajne infrastrukture.

Planovima su razrađene i definisane osnovne smjernice koje su utvrđene Odlukom o pristupanju izradi Regulacionih planova, kako za nove građevine, tako i za intervencije na postojećem građevinskom fondu, saobraćajnice i slobodne površine.

Na osnovu Inicijative Općine Ilijaš pristupa se izradi Regulacionog plana „Alića gaj“. Izrada Plana se radi u svrhu urbanog uređenja područja naselja Alića gaj, a iz razloga utvrđenih na osnovu analize postojećeg stanja i realnih potreba lokalne zajednice, stanovništva i zainteresovanih investitora, izmjenjenih potreba i namjera vlasnika i korisnika zemljišta za novom gradnjom, i izmjenjenih vlasničkih odnosa. Zbog ne mogućnosti provođenja Regulacionog plana „Alića gaj“ usvojen prije 28 godina izrada novog Plana je u cilju usaglašavanja sa planskim opredjeljenjima dokumenata višeg reda, kontaktnim prostornim cjelinama i donešenim regulacionim planovima. Planom je potrebno omogućiti urbanizaciju na zemljištu u obuhvatu Plana okarakterisanom kao uslovno stabilan teren i dijelom kao aktivno klizište (urađen Elaborat o inženjersko-geološkim i geomehaničkim karakteristikama terena, juli 2013.), poštujući interes Općine da se ovo područje urbanizira na kvalitetan način.

Vijećnici Općinskog vijeća Ilijaš su jednoglasno podržali Odluku o pristupanju izradi Regulacionog plana "Alića gaj" i prešlo se na 7. tačku dnevnog reda.

Privredno društvo „Misoča“ doo Sarajevo nije iskoristilo pravo na dodjelu koncesije bez provođenja javnog nadmetanja u skladu sa odredbama člana 35. stav 1 , 2 Zakona o koncesijama Kantona Sarajevo pa je u skladu sa odredbama člana 35. stav 4. za dodjelu koncesionog prava na predmetnom kamenolomu potrebno provesti javno nadmetanje za korištenje javnog dobra.

Za ovu tačku dnevnog reda nije bilo potrebne većine, te ista nije ni usvojena.

Na osnovu Zakona o javnim nabavkama i Zakona o cestama Federacije BiH, Općina Ilijaš je provela javnu nabavku putem otvorenog postupka za zimsko održavanje lokalnih i nekategorisanih puteva na području općine Ilijaš, te u skladu sa provedenim postupkom izabrala izvođača koji će vršiti zimsko održavanje puteva za period 2012 – 2015. godina.

Sa izabranim izvođačem općina Ilijaš je potpisala Okvirni sporazum na period od 3(tri) godine i za svaku sezonu sa izabranim izvođačem "Halilović"d.o.o.Ilijaš potpisuje se novi ugovor.

U prvom stepenu pripravnosti vrši se preventivno posipanje u slučajevima kada je za očekivati da će se temperature spustiti ispod nule i da će zbog toga doći do posljedice na

vlažnim mjestima (mostovi, osojna mjesta).

Drugi stepen pripravnosti podrazumijeva uključivanje u rad svih planiranih vozila sa opremom za čišćenje snijega i sprečavanje poledice, pomoćni radnici, kao i sredstva za utovar posipnog materijala, a uvodi se kad to vremenski uvjeti zahtijevaju (slabije snježne padavine i pojava poledice).

U treći stepen pripravnosti na osnovu najave (vremenske prognoze) Federalnog hidrometeorološkog zavoda kojom se očekuje dugotrajnije padanje snijega koje zahtijeva posebne radove uklanjanja snijega sa kolovoza, kada se pored vozila sa plugom i posipačem i sredstva za miješanje i utovar posipnog materijala, uključuju i jači utovarivači, grejderi i freze za odgrtanje i odbacivanje snijega sa kolovoza.

Četvrti stepen pripravnosti uvodi se kad snježne padavine, uz jak vjetar, imaju karakter elementarne nepogode i kad planirani broj ljudi i mehanizacije nisu dovoljni za uklanjanje snijega i kada se uz saglasnost Upravitelja puteva uvode i dodatna sredstva rada i radna snaga.

Nadzor nad zimskim održavanjem puteva od interesa za općinu Ilijaš u ime Naručioca-općine Ilijaš vršit će Služba za prostorno uređenje i stambeno-komunalne poslove.

Vijećnici Općinskog vijeća Ilijaš su jednoglasno usvojili Odluku o o usvajanju Plana zimskog čišćenja puteva na području općine Ilijaš u sezoni 2013/2014.godine.

Na inicijativu Općinskog načelnika, pokrenuta je procedura utvrđivanja novog građevinskog zemljišta za izgradnju apartmanskog naselja u Ljubničima i zatražene saglasnosti nadležnih kantonalnih ministarstava (Ministarstvo prostornog uređenja i Ministarstvo privrede).

Apartmansko naselje Ljubnići se sastoji od:

- Ⓟ PROSTOR NASELJA rezidencijalno-rekreativnog karaktera koje čine:
 - 108 parcela površine 1000-1500m²,
 - 108 Individualnih objekta riješena u tri tipa, stil tradicionalne bosanske kuće i modernijeg izražajnog stila, čije su površine 150-200m², maksimalne spratnosti dvije etaže,
- Ⓟ ZONA SPORTA I REKREACIJE koje čine otvoreni sportski tereni (mogućnost izgradnje dvorana)
- Ⓟ ZONA ODMORA I ZABAVE koje čine parkovske površine, staze, dječije igralište i mobilijar, ugostiteljski objekat
- Ⓟ ZONA DRUŠTVENIH SADRŽAJA koji čini objekat tržnog centra sa pratećim sadržajima
- Ⓟ SAOBRAĆAJNICE širine profila kolske saobraćajnice P 4,0-5,0m sa jednostranim trotoarima širine 1,0m,

Odluku o utvrđivanju novog građevinskog zemljišta i plana parcelacije za izgradnju apartmanskog naselja Ljubnići usvojena je sa 16 glasova za.

Lokacija apartmanskog naselja obuhvata parcele na lokaciji Donje Bioče koje se sastoje od:

- Ⓟ PROSTOR NASELJA-rezidencijalno-rekreativnog karaktera koje čine:
 - 263 parcele površine 1000-1500m²,
 - 263 Individualna objekta riješena u tri tipa, stil tradicionalne bosanske kuće i modernijeg izražajnog stila, čije su površine 150-200m², maksimalne spratnosti dvije etaže,
- Ⓟ KOLSKE SAOBRAĆAJNICE širine profila kolske saobraćajnice 4,0-5,0m sa jednostranim trotoarima širine 1,0m

Odluku o utvrđivanju novog građevinskog zemljišta i plana parcelacije za izgradnju apartmanskog naselja Donja Bioča Faza 1 je takođe dobila potrebnu većinu.

Jednoglasno je usvojena i Odluka kojom se reguliše organizovanje i funkcioniranje zaštite od požara i vatrogastvo, način ostvarivanja prava i dužnosti građana i pravnih osoba u oblasti zaštite od požara i vatrogastvu, nadležnost organa vlasti Općine Ilijaš, planiranje i provođenje mjere zaštite od požara, programiranje i planiranje, obučavanje i osposobljavanje i finansiranje zaštite od požara i vatrogastva na području općine Ilijaš u skladu sa Zakonom o zaštiti od požara i vatrogastvu, Zakonom o nadležnosti organa vlasti Kantona Sarajevo u oblasti zaštite od požara i vatrogastvu, kao i odredbama ove Odluke.

Vijećnici su usvojili i Odluku prestanka statusa nepokretnosti u općoj upotrebi zemljište označeno kao k.č. br. 469/2 "Bioča" ostalo neplodno zemljište u površini od 54 m2 upisano u Iskaz I javno dobro vode K.O. SP_Crnotina u kojem po novom premjeru odgovara parcela k.č.br. 1378/2 "Biočki potok" ostalo neplodno zemljište u površini od 54 m2 upisano u posjedovni list br. 56 K.O. Bioča.

NA 13. tački dnevnog reda našla se Odluka o odobravanju prodaje motornog vozila i ista je jednoglasno je usvojena.

Usvojen je i Prijedlog Saglasnosti za kandidovanje projekta zatvorene i otvorene tržnice "Ilijaš" Fondacija Odras u Sarajevu u svrhu obezbjeđenja dijela sredstava za izgradnju objekta.

U nastavku sjednice usvojeni su Prijedlozi rješenja iz imovinsko-pravne oblasti.

Informacija o stanju privrede i samostalnog privređivanja kao i Informacija o uspjehu i odgoju učenika u osnovnim i srednjim školama na području Općine Ilijaš u školskoj 2012/2013. primljena je k znanju.

I na kraju vijećnici su, na prijedlog Komisije za budžet, potrebnom većinom glasova usvojili i Odluku o izmjeni Odluke o visini naknade vijećnicima Općinskog vijeća i članovima stalnih i povremenih tijela Općinskog vijeća, kojom se naknada za vijećničke paušale povećava za 50,00 KM i iznosi 300,00 KM.

Nakon iscrpljenih tačaka dnevnog reda sjednica je završena u 16,00.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-690, fax. 400-505,
Transakcijski račun kod VAKUFSKE BANKE,d.d. Sarajevo:160200000710645
e-mail o_ilijas@bih.net.ba



Broj certifikata:CR14625Q